



Martin Candinas, president da la grupp, cun la ministra da finanzas Eveline Widmer-Schlumpf.

FOTOS C. CADRUVI

«Zac e senza firlefanf fissi fatg»

Fundaziun da la grupp parlamentara per lingua e cultura rumantscha

DA CLAUDIA CADRUVI / ANR

■ **Paucs plets, buna luna, massa glieud, musica e prominenz. La fundaziun da la grupp parlamentara rumantscha en chasa federala è stada in success. Passa sessanta cussegliers en s'inscrits ed en vegnids a la pitschna festa.** La mesemna saira han ins gi l'impressiun che la Rumantschia giardia ina simpatia infinita senza resalvas. Betg sulet ils parlamentarisch grischuns en vegnids a s'inscriver en la novissima grupp d'interess. Anzi, politichers da mintga fracziun han suandà l'invit da la Lia Rumantscha d'anc festivar il giubileum da 75 onns quarta lingua naziunala.

Fatg curtas cun l'act da fundaziun

Ils Rumantschs na fetschian mai gronda bahaultscha, ha ditg *Martin Candinas*. Sco president da la grupp na fetschia el perquai betg lungas. «Zac e senza grond firlefanf fissi fatg.» L'act da fundaziun è i uschè svelto ch'els fotografas n'han gnanca pudì reternair il mument memorabel.

La finala hai tuttina anc dà dus plets. Ils Rumantschs na sajan betg la pli pitschna minoritad, ha ditg il president dal cussegl naziunal *Ruedi Lustenberger*.

«Nus da l'Entlebuch essan anc pli pitschens.» Il pli aut Svizzer ha tradi ch'el amia tut questas minoritads. «Il pli bel en Svizra è che nagin posseda ina maioritad.»

Isabelle Chassot, scheffa da l'uffizi da cultura, ha exprimì la speranza ch'els Rumantschs cuntinueschian ad esser loschs da lur lingua.

Vin e vacanzas – militar e gimnasi

Passa tschient gruppas datti uffizialmain en chasa federala. Las bleras dumbran forsia in tozzel commembers. Pertge s'enritschan ussa tants politichers gist en la grupp rumantscha? Mintgin ha ses motiv persunal.

Hannes Germann (pps/SH) passenta adina sias vacanzas en Lumnezia. Sco president da la chombra pitschna ha el termin tut che buglia. Tuttina na desista el betg dad ir cun skis a Vella.

Gerhard Pfister (pcd/ZG) recitescha «stai si defenda Romontsch tiu vegl lungatg». El ha passentà la scola clastrala a Mustér e sto perfin esser stà a cumin, pertge era «si cun el» e «giu cun el» ha el tegnì endament.

Fabio Regazzi (pcd/TI) ha sco Tessinais gronda simpatia per ils Rumantschs.

Ses chantun haja da sbatter cun ils medems problems sco il Grischun.

Buttet Yannick (pcd/VS) punctuescha che la solidaritad muntagnarda daventia adina pli impurtanta, sche las citads gudognian influenza. El ha fatg militar a Maiavilla ed ha emprendi d'enconuscher sper las pitgognas er il bun vin dal Signuradi.

Maximilian Reimann (pps/AG) demussa enconuschientschas extraordinarias da la geografia sursilvana. Il specialist da finanzas dumbra schizunt si tuttas fracziuns da Sumvitg e sa regorda da massa famiglias ch'el enconuscha là.

Auters raquintan ch'in u l'auter parlamentari grischun als haja motivà da far part da la grupp. En quest connex croda savens il num Candinas. Ma era *Heinz Brand* è chalzerà. Passa diesch representants da sia fracziun en s'inscrits.

Anc nagins plans concrets

Per il mument n'ha la grupp betg en senn d'inoltrar intervenziuns, di Candinas. La finamira saja da sensibilisar. Sche mintgin da questa grupp procura ch'il rumantsch vegnia resguardà per ina inscripziun, translaziun u en ina pagina d'internet hajan ins cuntanschì gia bler.



Vegnan bain perina – il president da la Lia Rumantscha Duri Bezzola e la parlamentara Silva Semadeni.



L'editura rumantscha Anita Decurtins, il pli aut Svizzer Ruedi Lustenberg e Victoria Haas che ha moderà la sairada.



Il vicepresidente da la Lia Rumantscha Rino Darms cun cusseglier naziunal Maximilian Reimann (pps/AG).



Fans dal rumantsch – ils dus cussegliers nazionals Gerhard Pfister e Marco Romano.



Medias e politica – il director dad RTR Mariano Tschuur ed ils cussegliers nazionals Josias F. Gasser e Hansjörg Hassler.



Ils parlamentarisch Martin Schmid e Daniel Fässler cun il schurnalist Adrian Camartin.